

榕

陰

新

檢

榕陰新檢卷十六

閩徐 焌興公輯

歛吳洵美克符校

詩話

山居遺詠

邵京實字仲堅閩縣人務學而隱國祕若葉鉞林玉
鍾耆德鍾明德任宗仁林延孫吳忠皆爲道誼交有
過從卽相與唱和爲樂詞皆清雅惜其遺稿散逸弗
傳惟明德爲京實所題山居十六詠僅存今錄三首
其山屏秋月詩云浩歌起舞不成眠清閒入骨疑欲

仙山風吹夜露華滴一聲孤鶴秋連天赤石暮霞詩
云巖前昔日仙人家仙人結廬煉丹砂火光照石石
爲赤祇今暮暮流雲霞巫頂飛雲詩云白雲飛去山
色深白雲飛歸山色陰時來時去自今古山亦無語
雲無心有人結廬占巫頂白石支頭臥雲影清宵雲
起隨飛龍行雨歸來人未醒

福州舊志

守杭題味

陳文惠公述古守杭州喜江南梅度支至二首淡薄
交情老更濃爲君彈瑟送金鍾
葶羅香逕無人到姑射
僊姿在處逢鸞鶴品流慙
晚達烟霞門戶憶先容

公餘莫負西湖景步步蒼苔岼岼松其二公望當年
最得君畫圖城郭喜同群門前碧浪家家海樓上青
山寺寺雲松下玉琴邀鶴聽溪邊苔石共僧分情多
景好知難盡且倒金尊任半醺杭州繁盛自宋時已
然此詩錢唐景物已畧盡矣又題林和靖水亭詩云
城外逋翁宅開亭野水寒冷光浮荇葉靜影浸漁竿
吠犬時迎客饑禽忽上闌踈籬僧舍近嘉樹鶴庭寬
拂砌烟絲裊侵窓筍戟攢小橋橫落日幽逕轉層巒
好景吟何極清歡盡亦難憐君留我意重疊取琴彈
齋閣中絕句二首綽約新嬌生眼底侵尋舊事上眉

尖問君別後愁多少好似春潮夜夜添又云長鬢玉
筋殘粧臉肯爲金釵露指尖萬斛閒愁何日盡一分
真態爲誰添盃爲佳人叙幽思也蘇子瞻書此詩并
周胡龍三妓詩作一卷元時柯敬仲得之虞邵庵伯
生題其後云祇今誰是錢唐守頗解湖中宿畫船曉
起鬪茶龍井畔花開陌上載嬋娟又云三生石上舊
精魂邂逅相逢莫重論縱有繡囊留別恨已無明鏡
著啼痕又云能言學得妙蓮華贏得春風對客誇乞
食衲衣渾未老爲誰靈塔向金沙

西湖志

投詩見賞

林鴻字子羽福清人詩名聞海內毘陵浦舍人初至
閩時往見子羽子羽不出使二玄問所爲來浦舍人
乃書送人之荆門一詩投之曰以此相評耳二玄讀
至雲邊路遶巴山色樹裏河流漢水聲大喜遂白子
羽子羽出見甚懽因留連久之多所唱和浦舍人詩
名於是大諫浦舍人名源二玄謂黃玄周玄也

劉欽
謨嶽臺集

題却金亭

正統間福建都司王勝身居武弁有文德廉介自持
出巡則齋食自隨人呼爲齋王一日有千戶奉白金

一定以餽不受命造亭衛北名却金明年勝到亭題
曰每因性褊遭彈劾四十年過不動心匣內惟存三尺
劍囊中肯受四知金平生節操何曾改半點秋毫孰
敢侵今對此亭堪駐馬仰天無愧發長喙時海道副
使李顥曰孔子忍渴盜泉之水曾子迴車勝母之間
惡其名也暮夜金不受義也何必求聞於人因題云
懷金相送獨能辭高構華亭照路岐不比當年胡刺
史平生清節畏人知胡刺史胡威父也

群談採餘

題帘得錢

福唐有老嫗當壚有舉子謂嫗曰吾能與爾致數千

錢乃令姬作酒帘題曰下臨廣陌三條濶斜倚危樓
百尺高太守王祠部達見之大喜呼姬與錢五千酒
一斛盃詩乃王公詠酒旗詩平生最得意者

詩話總

賦聯稱旨

紹興間黃公度榜第三人陳修福州人解試四海想
中興之美賦第五韻隔對云葱嶺金堤不日復廣輪
之舊泰山玉牒何時清封禪之塵時諸郡試卷多經
御覽高宗親書此聯以幅紙黏之殿壁及唱名玉音
曰卿便是陳修吟誦此聯凄然出涕因問卿年幾何

對曰臣年七十三問卿有幾子對曰臣尚未娶乃詔
出內人施氏嫁之年三十貲奩甚厚時人戲爲之語
曰新人若問郎年幾五十年前二十三

鶴林玉露

三歲神童

蔡伯侏閩縣人四歲對真宗誦書授校書郎春宮伴
讀齒猶未三週故曰三歲神童賜之詩曰七閩山水
多才俊三歲竒童出盛時家世應傳清白訓嬰兒自
得老成資初嘗學步來朝謁方及能言解誦詩更勵
孜孜圖進益青雲千里有前期

續歸田錄

五歲神童

林傑字智用閩縣人五歲與父同遊王仙君壇父曰
能詩乎傑曰羽客已登雲路去丹砂草木盡凋殘不
知千歲歸何日空使時人掃舊壇又謁唐中丞作七
夕詩曰七夕今朝看碧霄牽牛織女渡河橋家家乞
巧望秋月穿盡紅絲幾萬條唐公曰真神童也年十
歲方秋初忽有雙鶴盤空而下忻然下塔抱得一隻
父恐非祥令放之鶴升空而去是夕得疾卒鄭立之
以詩哭之曰才高未及賈生年何事孤魂逐逝川螢
聚帳中人已去鶴離臺上月空圓

古今詩話

林傑幼而聰慧言發成文質瑩凝脂音清扣玉方五

歲因父挈遊王仙君壇忽吟一絕

云云

後業詞賦頗

振聲光有仙客入壺中賦云仙客變化隨物逍遙放
情處于外則一壺斯在入其中則萬象皆呈飛閣重
樓不是人間之狀奇花異木無非物外之名至九歲
謁大夫盧員常侍黎埴無不嘉獎尋就賓薦日在讌
筵侍御李遠支使趙格深所知愛和趙支使詠荔枝
尤佳金盤摘下排朱顙紅壳開時飲玉漿副使鄭立
之作奇童傳

閩川名士傳

伯初寄荅

謝伯初字景山閩縣人天聖景祐之間以詩知名余

謫夷陵景山爲許州法曹以長韻見寄有云長官山
色江波綠學士文華蜀錦張余荅曰叅軍春思亂如
雲白髮題詩愁送春益景山有多情未老頭先白野
思到春如亂雲之句故余戲之景山詩頗多如自種
黃花添野景旋移高竹聽秋聲園林換葉梅初熟池
館無人燕學飛皆無愧唐賢仕宦不偶終以困窮而
卒

歐陽公詩話

詩聯諷諭

閩邑庠士鄭堂能詩一日太守唐詢夫人暴卒閩縉
紳先生與庠士皆往夫人淚濕猶視不敢遽殮堂在

下因口占一絕夫人懿德玉無瑕四十年來鬢未華
何事臨終兩行淚恐教兒子看蘆花遂暝公感慟之
後終身不再娶

鶴汀私抄

寄詩寓意

三山鄭堂善詩且多滑稽嘗寄親戚令廣東者一絕
云三尺兒童事未諳饑來強扯我藍衫老妻牽住輕
輕語爹正修書去嶺南可謂善曉人者

鶴汀私語

晞髮集詩

謝臯羽晞髮集詩皆精緻奇峭有唐人風其鴻門讌
火雲屬地汗流宇杯影龍蛇分漢楚楚人起舞本爲

楚中有楚人爲漢舞鴈鵝淬光雖不語楚國孤臣泣
俘虜君看楚舞如楚何楚舞未終聞楚歌短歌行秦
淮沒日如沒鵲白波搖空溼弦月舟人倚棹商聲發
洞庭脫木如脫髮海上曲水花生雲起如葑神龍下
宿藕絲孔明河篇牽牛夜入明河道淚滴相思作秋
草婆女城頭玩月華星君冢上無啼鳥俠客吳歌潮
動西風吹牡荆離歌入夜斗西傾傾飛廟下蛇含草
青拭吳鉤入匣鳴效孟郊體牽牛秋正中海白夜疑
曙野風吹空巢波濤在孤樹律詩五言如驛花殘楚
水烽火到交州夜氣浮秋井陰花冷碧田山鬼下茅

屋野鷄啼苧蘿戍近風鳴柝江空雨送船柴關當太
白藥氣近樵青暗光珠毋徙秋影石花消下方聞夕
磬南斗掛秋河又如雨青餘化血林黑見歸魂越樹
夜啼鳥禹陵冬落花積葉吳宮冷吟猿頽渚秋杉影
動寒水夕陽藏半峰七言如烏栖烏啼宮燭秋越女
入宮吳女愁陰風吹雪月墜地幾人不得揚州死蒼
苔染根烟雨泣歲久游魂化爲碧莓苔鎖窓居鬼神
散髮天衣夜行酒人間青烟濕塵鞞藥臼嗟噉壓天
夢等句雖未足望開元天寶亦可以據長慶寶曆之
上座矣

輕薄不達

陳通方閩縣人唐貞元中及第號稱名士同邑陳彥博元和中及第李滂開成中及第薛承裕咸通中及第陳蜀乾符中及第林哀大順中及第俱有詩名初通方與相國王播同榜播年五十通方戲拊之曰王老王老奉贈一第言日暮途遠同贈官也播後入相通方因之仕宦不達官止南陵院官而終省試春風扇微和通方詩曰習習和風扇悠悠淑氣微陽升知候改律應喜春歸池柳晴初折林鶯煖欲飛川原浮彩翠臺館動光輝泛艷搖丹闕揚芳入粉闈發生當

有分枯朽幸因依

閩掌故

卓稼翁詞

三山卓用字稼翁能賦詩嘗作詞云丈夫隻手把吳
鉤欲斷萬人頭因何鐵石打成心性却爲花柔君看
項籍并劉季一怒使人愁只因撞虞姬戚氏豪傑都
休

山房隨筆

神童咏月

唐開元間嶺山繆氏有子七歲聰慧能文以神童召
試新月詩云初出如弓未上弦分明掛在碧霄邊時
人莫道蛾眉小十五團圓照滿天

鶴汀私抄

得句自快

周朴字太朴其先吳人唐季避地安溪後居福州烏石山寺不飲酒茹葷諸僧晨粥卯食朴亦彗巾盂坐諸僧下畢飯而退率以爲常郡中豪貴設供施僧卽巡行拱手各丐一錢有與以三錢者止受其一性喜吟詩尤尚苦澁每遇景物搜竒抉思日旰忘返得一聯一句則怡然自快嘗野逢一負薪者忽持之且厲聲曰我得之矣樵夫矍然驚駭掣臂棄薪而走遇遊徼者疑樵爲偷兒執而訊之朴徐往告曰適得句耳乃釋之蓋賦古墓詩少落句偶見樵者子孫何處閒

爲客松栢被人伐作薪朴嘗有禹力不到處河聲流
向西之句恒自稱譽有客知其自負途遇朴佯誦向
西爲向東遂鞭馬令駛而朴追至數十里挽銜勒而
告之曰此予詩也向所誦向東當是西字之誤耳其
好竒如此

高賢傳

天風海濤

丹鉛摘錄曰趙汝愚詩江月不隨流水去天風直送
海濤來朱文公愛之遂書天風海濤字於石今人不
知爲趙公詩也愚按用修謂今人不知爲趙公詩卽
用修亦不知文公書在吾閩鼓山之顛朦朧臧否可

發一笑

竹窓雜錄

駝蹄荔枝

唐制驛置有明駝使非邊塞軍機不得擅發楊貴妃私發明駝使賜安祿山荔枝事見小說予近作荔枝譜成陳幼孺賦荔枝詩十首中有詠駝蹄荔枝云朱實西來驛路長明駝驕蹠滿蹄霜當時也合馳千里不獨涪州馬足忙其用事妥帖予思慮所弗及者贊服久之

竹窓雜錄

玉岑詩社

祝時泰字汝亨閩人舉嘉靖壬午鄉薦歷任德府長

史棄官隱於杭州西湖築室以居與光州守高應冕
承天守方九叙憲副童漢臣處士沈仕王寅劉子伯
結玉岑詩社人主一山卽景賦詩時推祝爲祭酒一
日登鳳山各賦懷古詩祝云白馬南來定宋京五雲
長繞鳳山城星隨數盡中天隕潮讓沙屯兩日兵輦
路獨餘春草綠行人猶說故官名當年多少難平恨
併作江流萬古聲製作皆弗及也

竹窓雜錄

滄州警句

陳亮字景明沙堤人居作儲玉樓爲藏書之所建
滄州草堂日與名士高棟王恭周玄林鴻鄭定輩廢

唱迭和又締三山諸耆彥爲九老會號滄州有滄洲
集多軼不傳傳者如微風度荷香霽月散林影風生
蘆葦鳴水落洲渚廣皆警句也景明生于元泰定間
至永樂中年已八十矣閩十才子景明最長

竹窓雜

典籍遺詩

王典籍生平佳句超子羽彥恢而上之孟揚二玄諸
子遠拜下風如書王孫射鴈云錦袍朱帽綠弓弦却
射飛鴻灞水邊不識柳林關外路白狼黃鼠滿秋田
著李白問月云銀甕閒傾采石春水天涼月夜無塵

如何翠輦西行處，疑碧池頭照別人。書李白觀泉云：朝別金鑾是醉鄉，香爐飛瀑晚蒼蒼。布衣蚤悟雲泉興，不到秋霜滿夜郎。題袁塵騮云：斲卸銀鞍賜浴歸，錦塵香撲袞龍飛。誰憐習戰陰山北，滿地黃埃首窟肥。淘沙揀金往往見寶。

竹窓雜錄

山中太守

嘉靖丁巳，朝廷詔下採木時，陳津南先生全之爲荊州守，奉命入蜀，自作中山太守歌。荊州太守陳津南出建隼旗，乘右駮，舍車策蹇入山谷，道穿鳥背覓杉楠。來時正是三月三，迎人乳燕聲呢喃。凌危上俯

千崕碧屐險下欄百花峪野貓崗口亂石龕蒙密交
加天蔚藍山精野魑向人語樵童牧豎時共談登高
若與星斗參黝如禹穴不可探雲迷竹徑窺紅日霧
繞征衣滴翠嵐柳木鱗次若荷擔找橋架壑爲廂函
前呼後應資人力左推右挽皆丁男我愿皇天憫愚
慙風雲雷雨走彪虺盤巖邃澗水彭湃千流萬派漲
溪潭蔽日連雲飛巨筏造作厦室垂眈眈蒼黃老子
出茅菴青山如幃水泓涵帝居山河賀燕雀芙蓉溪

上薰風酣

竹窓雜錄

漢祀垓詩

武夷漢祀垓勝蹟最古歷千百年題咏不乏皆無警
拔語獨陳汝翔一絕云吸露餐霞絕世氛石垓親見
武夷君漢家天子多烟火却把乾魚污白雲前無古
人後無來者

竹窓雜錄

宮人斜詩

宮人斜唐人多有賦者秦京雜記云長安舊墻外長
三里曰宮人斜風雨夜多聞歌哭聲雍裕之幾多紅
粉委黃泥野鳥如歌又似啼應有春魂化爲燕年年
飛入未央栖爲唐人絕唱後權德輿陸龜蒙竇鞏孟
遲數絕不及也惟謝在杭有云落花啼鳥怨青春生

不啣恩死作塵長信月明秋寂寂君王只夢李夫人
探驪得珠矣

竹窓雜錄

丁戊山人

丁戊山人傳汝舟與鄭吏部善夫交莫逆鄭詩蒼古
學杜傳詩雖師法乎鄭而天然之趣尤勝如雖貧一
榻能高臥縱老名山欲遠尋焚香謾與僧來往得句
惟應弟倡酬郊原亂後飛燐火村落年來變劫灰異
書自得作者意長劍不借時人看呼來鷓鴣添新侶
拋去鷓鴣省舊糧新點玉書仙賜讀舊趨瓊閣帝容
歸等句絕無一毫塵垢之氣

竹窓雜錄

畊隱詩卷

畊隱先生鄧定字子靜元至正間遣使徵之不起曰
吾寧晦跡山林不肯身事胡虜也洪武中又徵不起
曰吾旣削迹畝畝生於元已不事元肯仕明乎遂終
身耕隱卒無子有詩數卷其從孫汝高序而梓之如
松窻朝聽雨石碓夜舂雲澗光搖樹影石甃沁苔衣
野水流花出松雲載雨還看山曾到寺隔水忽聞鍾
酷有王孟風骨

竹窓雜錄

周朴逸詩

唐詩紀事載周朴事甚奇收其詩特數句耳朴詩甚

多余嘗見于他集中如夜色薊門火秋聲邊塞風野
烟孤客路寒草故人墳客淚有詩有猿聲無處無不
是旅人病豈知秋夜長歸鄉憑遠夢無夢更思鄉牛
馬放多春草盡原田畊破古碑存竹在曉烟孤鳳去
劍荒秋水一龍沈皆晚唐之妙句也予嘗掇拾朴詩
一卷并歐陽詹陳陶林寬黃滔韓偓翁承贊秦系陳
嘏徐寅孟貫作唐十二家尚乏梓錢耳

竹窓雜錄

許詩二句

嘗聞許黃門天錫能詩鄉士大夫皆言天錫才子恨
遺言不傳於世近得使安南一稿盈百餘篇無可大

擊節者陳參知元珂選閩中詩收天錫詩數章亦皆
陳腐只青山當面似無路黃犢出林疑有村二句頗
有晚唐氣味

竹窓雜錄

題畫詩識

閩長樂鄭憲未第時館于邑之大家館東戚屬以省
祭還自京東人召飲先生亦與焉定位左省祭右先
生將登筵省祭虛讓曰鄭先生請左先生慨然就之
不辭省祭頗啣之酒數巡省祭顧指壁間畫曰鄭先
生高才何不各請賦一絕東曰久懷此意第未敢發
耳先生曰不難卽索題之一幅乃楊太真醉臥於地

二闈宦扶起之不勝明皇顧笑之狀龍顏回首顧紅
顏醉臥東風上馬難不是侍兒扶不起只因恩愛重
如山次幅乃買臣採樵讀書一擔荆薪一束書且行
且讀樂何如擔頭自有經綸策堪笑糟糠愚婦愚三
幅韓淮陰乞食漂母乞丐當年事本虛英雄未遇古
誰無臨題恨殺丹青手不畫登壇拜將圖四幅乃桃
竹間植竹桃二物不相同萬綠叢中幾點紅我去化
龍君作浪人生何地不相逢題畢賓主各各嘆賞後
先生聯登科甲歷官巡撫省祭以典史爲公所屬一
龍一浪其識與

筆記

令妻留詩

未福開平里太原灘灘下石刻太原二字唐太中初
縣令王某罷官艤舟于此邑中餞行暮夜未返夫人
題詩一章何事潘郎重別筵君心未斷妾心懸太原
灘下相思處猿叫山山月滿船政和三年知縣陳武
佑刻之石 三山志

穉源繼響

鄧文涓字穉源古田人古田自張學士以寧後二百
年間寥寥絕響文涓少負才氣舉嘉靖丁酉鄉薦官
同知著作甚富如早行市橋霜滑馬庭樹月移烏宿

南陽寺堦餘春草露林暗夕埃雲曉泛羅刹江雲沙
醒宿鶯露葉咽殘蛸早秋草換秋前色蟬繁雨後聲
過萇弘墓貞血成靈碧忠名照汗青潼關道中山河
秦地盡烽戍塞雲高味斷鴈霜前陣帶金河冷月下
書傳玉塞寒夏日齋居烟消露草粘遊屐風定晴花
掛網絲亂後殤魂暗泣關山月冤血腥隨草木風早
發水口腥紅被野霜粘樹鴨綠搖波雨染溪可與晚
唐劉許輩頽頽稅林近年劉邑令慕脩縣志不爲立
傳且詆之時陳价夫力諍不聽俗吏之剛愎自用如

此竹窓雜錄

才翁詩字

宋蘇才翁爲閩觀察使長樂當陽寺有詩云未窮雙
佛刹先列一漁家山雨已殘葉溪風猶落花汲泉沙
脉動敲火石痕斜應是佳公子竹間曾煮茶游鼓山
靈源洞鑄八分書徑二尺于石壁古雅不凡蘇公詩
字在宋季亦鐵中之錚錚者耳

竹窓雜錄

檢討逸詩

宋樂初王偁孟揚辟授檢討有虛舟集行世歌行律
絕如幽澗流泉清而有韻近年彙刻十子集孟揚詩
刪去十之三如咏紅葉云一片飛來堦下紅滿林驚

覺夜霜空綠圭不剪封周弟錦字頻題出漢宮亂撲
征衣山徑裏染成秋色夕陽中幾回記得停車處錯
把春華認晚楓又如寄張真人云海濶傳書曾命鶴
夜深飛佩欲騎星又如挽林處士云雨荒脩竹棋聲
靜塵滿閒來鳥跡稀又如送人之揚州云往事玉簫
明月夜江南春雨綠蕪天皆集中佳句也當時削之
太嚴每覽舊刻輒爲三嘆

竹窓雜錄

六歲吟詩

王維琬閩縣人六歲能詩郡守吳崧召至署中試看
竹詩琬應聲曰爲愛淇園種冰霜許此心雲收開鳳

尾風動作鸞音散地玲瓏玉穿簾瑣碎金羨公明政
暇清興發高吟又春日曉望詩有句云春圃雨來花
落早曉堤風急絮飛忙人占其不壽未幾卒

竹窓雜

錄

晏鋒選詩

林子羽鳴盛集學唐極力摹擬不但字面句法并其
題目亦效之開卷驟視宛若舊本然細味之求其流
出肺腑卓爾有立者指不能一再屈也宣德間有晏
鋒者選本朝詩亦名鳴盛詩集其第一首林子羽應
制曰堤柳欲眠鶯喚起宮花乍落鳥啣來益非林最

得意者則其他所選可知

麓堂詩話

題詩釣臺

古田張志道學士題釣臺詩云故人已乘赤龍去君
獨竿裘釣月明魯國高名垂宇宙漢家小吏待公卿
天回御榻星辰動人去空臺山水清我欲長竿數千
尺坐來東海看潮生

卷塘詩話

旅館題菊

姑蘇唐子畏過寧德宿旅邸館人懸畫菊子畏愀然
有感題云黃花無主爲誰容冷落踈籬曲徑中儘把
金錢買脂粉一生顏色付西風

群談采餘

題買臣像

閩鄭堂題朱買臣云四十年來命若何書聲長聽出
烟蘿他年露冕經行地無數青山識面多又鄭鵬云
噫嘻此是朱買臣貌來未識真不真夜窓展玩發長
嘆爾來四十誰相親凌晨引斧入山麓向曉出街來
賣薪書聲隨擔不輟響孔顏恍惚交形神此時敝衣
兼破笠他年紫綬輝朱輪庸孺奔走且駭汗舉頭悵
望瞻車塵乃知窮通有定命古今如此非君身會稽
愚婦君莫嗔于今更多白眼人

群談采餘

仲和留題

陳白沙先生倡道東南閩吳鏘仲和舉進士宰陽偶
流寇陷治謫南海衛幕往叩陳以其衛幕也竟拒之
吳大書廳壁云考亭亭下蹟荒蕪野鳥庭中獨自呼
欲向白沙問真處越人曾笑楚人愚又見壁間一漁
翁晒網圖題云扁舟一葉抵天涯罷釣歸來晒晚霞
莫道水村兒女拙也會梳洗插金花書畢遂去白沙
讀詩悵恨追之不及

群談采餘

詩題王墓

閩王審知墓在蓮花峰下宣德四年爲盜所發獲金
寶無算有司仍復脩治古今題其墓者甚多余伯兄

惟和一首爲最玉輦何年去不回霸圖千古總成灰
秋深兔穴依寒壠歲久魚燈暗夜臺故國關河甌越
在遺民蘋藻鼎湖哀蓮花峰下黃昏月猶見三郎白
馬來審知在軍中好騎白馬人呼白馬三郎

竹窓雜

錄

鄭圃題詠

鄭吏部繼之謝病家居築別墅名桑苧園自書其門
曰少谷柴門顏其堂曰青野信陽何景明寄題鄭圃
云三山今有鄭公園避俗從來亦避喧蘿竹青青齋
谷口花林靄靄覆桃源天邊鴻鴈春寥廓海畔蛟龍

畫曲蟠南海尺書招隱意白雲叢桂幾攀翻園今寥
落不可問矣

竹窓雜錄

諫議逸詩

翁承贊字文堯福清人舉唐乾寧三年進士累官右
拾遺戶部員外後失節爲梁諫議大夫自號狎鷗翁
全唐詩話載其槐花一絕云雨中妝點望中黃勾引
蟬聲送夕陽憶昔當年隨計吏馬蹄終日爲君忙承
贊有詩集一卷見唐稭文志并畫錦集宏詞前後集
共二十卷俱軼不傳余家收得冊封閩王時律詩三
十餘首中多佳句如窓含孤岫影牧臥斷霞陰早涼

生戶牖孤月照關河參差鴈陣天初碧零落漁家蓼
欲紅長淮月上魚翻鬣荒渚人稀獺印蹄松都舊日
門人種路是前朝釋子開綽有風韻可愛誠晚唐作
手也

竹窓雜錄

玉帶侑觴

龍麟州先生過福建憲府設宴命官妓玉帶佐酒憲
使舉盃曰今日之歡皆玉帶爲之也願賜以詩先生
負海內重名雅畏清議又不能違憲使之請遂書一
絕云齒蒼池邊風滿衣木樨庭下雨霏霏老夫記得
坡仙語病體難禁玉帶圍於是舉席稱嘆盡歡而散

風流太守

宋辛稼軒爲福州守所作詞甚多有西江月云貪數
明朝重九不知過了中秋人生那得許多愁只有黃
花如舊萬象亭中置酒九仙閣上扶頭城鴉喚我幾
歸休細雨斜風時候時有盧國華由閩憲移漕建安
陳端仁給事同諸公餞別稼軒爲酒困臥清涂堂三
鼓方醒廼賦滿江紅云宿酒醒時算只有清愁而已
人正在清涂堂上月華如洗紙帳梅花歸夢覺尊羨
鱸膾秋風起問生得意幾何時吾歸矣君若問相思

事料長在歌聲裏，這情懷只是中年如此。明月何妨，千里隔，願君與我何如耳。向尊前重約幾時來。江山羨稼軒，歷城人可謂風流太守矣。棄官後，僑寓鉛山，而卒。今分水嶺下有稼軒墓在焉。

竹窓雜錄

題冲虛觀

元陳旅字衆仲，莆人有詩文二卷，詩勝其文。題福州冲虛觀云：力士持兵守絳宮，吹笙人去斗垓空。白榆城闕秋雲上，紅樹樓臺夕照中。鴻寶昔疑丹枕謬，靈泉今悟土池通。他年不跨芝田鶴，曾向清虛學馭風。

此首本集不載，餘皆類此。

竹窓雜錄

樂府擅長

五言樂府藁砧體最不易作陳幼孺林子真按其長
陳古意云黃蘗種作籬圍繞合歡樹不見合歡時但
見生離苦子夜歌云不見金鈿鋤火盛柄自藝裁衣
持寄郎郎溫儂亦熱林情詩云春風誰謂煖不入妾
空房只向鴛鴦瓦吹露不成霜陌上桑云秉燭理殘
妝涉露持筐出爲慮桑葉稀傷絲不成疋又云晨去
暮來歸乃在三春時繁條採桑葉辛苦爲誰絲錦心
繡口不復多見

竹窓雜錄

詩定雅俗

林侍御鉞嘗慕孫山人太初往訪之孫留坐竹下贈
林詩云清泉長日漱潺湲豸史峩冠訪竹關自笑道
人迂野性相逢先問武夷山詩思清逸有林壑幽致
第豸史峩冠之句頗譏林公有貴倨態至贈鄭繼之
新着小烏巾云道人相見一笑同烏巾自製誇新工
禮數懶慢政着我山林風流今愛公眼前物議一時
事溪邊自照雙鬢蓬接籬倒載間紅羽何當江上尋
漁翁觀此詩繼之條然物外絕無軒冕之氣而太初
二詩直定二公之雅俗矣

竹窓雜錄

搗衣傑作

潘庭堅作搗衣曲云搗衣搗衣復搗衣搗得更深月
落時臂弱不勝砧杵重心忙惟恐搗聲遲妾身不是
商人妻商人射利東復西妾身不是蕩子婦寂寞空
房爲誰守妾夫爲國戍邊頭黃金鎖甲跨紫騮從渠
一去三十秋死當廟食生封侯如此別離猶不惡年
年爲君搗衣與君着志趣高遠異於衆作廷堅名牘
閩縣人以字行端平進士第三

竹坡詩話

新柳落花

康元龍咏柳云照影盈盈拂自垂受風縷縷弱還吹
關山笛裏思歸引灞水橋邊恨別枝翠黛莫因春去

損纖腰乍向月明移可憐空傍章臺老欲惜凋零更有誰
袁無競落花云江南春信迤相催片片輕紅委碧苔
雨暗妝樓和淚滴風飄繡幙帶香來綠珠掩袂辭金谷
妃子含哀塋馬嵬恠底欄杆長寂寞曾無一片蝶飛回
二君壽俱不末

竹窓雜錄

詩調司理

謝在杭司理吳興時太守北人極忌衣白或出遇白衣者輒置之法因前守卒于官甫蒞任盡撤其堂宇
廨舍掘地數尺重爲架造百姓苦之在杭作吳興竹枝詞十數首有云五月新絲白勝綿輕羅織就雪花

鮮爲郎製得雙襦子官府頭行不敢穿又云臘盡春
生年復年望郎長望太湖邊水門不閉聞簫鼓迴避
黃堂采木船太守聞之不悅時當計吏遂陰中之調
爲東昌司理然民間盛傳其詩爲口實也

竹窓雜錄

題湧泉寺

林茂之嘗登鼓山至湧泉寺寺經野火六十餘載僅
茅茨數椽遊僧一二月而已題詩云何代黃金建講
臺不看全盛獨興衰斷橋仆澗空秋草廢礎成砂沒
古苔游客暫依殘院宿住僧都是別山來湧泉空自
稱靈水不向當年滅燼灰

竹窓雜錄

知事遺詩

元季詩人陸天錫鴈門人至元間辟爲閩海廉訪司
知事遺詩數卷詞藻橫逸今錄南臺看月歌云城南
江上逢中秋城南石梁初截流長虹一道貫秋色中
分百里江南州殘霞消盡魚尾黑金蛇翻動三江白
水輪碾出碧玻璃照見釣魚臺上客臺中之客懷古
心黃河太華三登臨今年携月醉臺畔越水越山爲
月吟無諸城裏人如海無諸故塚埋殘靄無諸城上
草離離龍去臺空幾千載昔龍已去江悠悠今龍雖
在人未求懷珠豈立此臺下腰上黃金臺上釣乾坤

四顧渺空闊詩書元氣行勃勃合沙古讖此其時天
下英雄求一決南臺月照男兒面豈照男兒心與肝
燕山買駿金萬斛萬里西風一劍寒又登烏石山仁
皇寺橫山閣云千尺金蓮座烟霞擁地靈山川幾輛
屐日月兩浮萍烏沒天垂海龍歸水在瓶深堂說法
夜應有石頭聽又立秋日登烏石山云海國山四圍
繁華坐消歇樓觀沉夕陽鴻鴈下秋色水邊無麗人
石上多古刻感此暮歸遲秋霜滿山白

竹窓雜錄

太守罷宴

孝廟晏駕時午日太守及僚屬飲于西湖秀才鄭堂

以素巾過其前太守呼攝之問其名曰堂也守曰子能詩可賦之堂曰苦欲某作詩請題太守曰卽以苦字爲題堂應聲曰苦苦苦苦憂天明君晏駕未週年山川草木皆流淚不忍西湖看畫船太守因之罷

宴

竹窓雜錄

賦老妓詩

黃道行名用中以詞翰著聲有味老妓云舞榭歌臺早擅名盛年偏恨暗中更篋中羅綺非時製鏡裏鉛華異後生喜向隣姝誇舊事厭聞公子愛新聲春風漫有爲雲思月冷更闌夢不成

竹窓雜錄

香囊乞詩

趙仁甫年少時有新寡者繡湖陽公主于香囊命其
子乞詩仁甫知意題云湖陽自有共姜操戲使綸音
試宋弘其人自此不復通問

竹窓雜錄

大旱禱雨

萬曆乙未夏秋閩省大旱官府令諸鄉村作土龍捕
蜥蜴祈雨富人閉糶索高價陳幼孺有禱雨謠云禱
雨禱雨土龍背裂蜥蜴死貧民搗鼓號籲天淵中老
龍不得眠師巫禹步走田野唇焦面赤喉生烟東隣
富兒檢廂籍陳陳尚有三年積但願粟價十倍售何

必年年是豐日貧人顙泣復怨嗟火雲祈得紅如霞
龍王無靈天帝遠巫師漸次迯還家土龍前致富翁
語但旱貧人不旱汝

竹窓雜錄

譚氏寄夫

未樂古田鄭均德歲貢入太學五閱春秋不歸妻譚
氏在家悵望時逢秋日涼飈將動遂製鞋襪并詩以
寄之云細襪宮鞋巧樣新慙慙寄與讀書人好將穩
步青雲上莫向平康謾惹塵

稽古彙編

題平章墓

元平章王積翁墓在福安縣華峰山路傍翁仲石獸

存焉縣令于震餘姚人題詩云福寧城中往來路知
是人家舊墳墓道旁石人相對立下擁石羊驅石虎
此墳距葬知幾年高原無壠低無阡墳中白骨定遭
掘四邊已作人家田石羊無知石人苦有口應慙不
能語眼見主人營此墳今日無墳豈論主人言人死
葬墳好豈知有墳還不保烏鳶螻蟻同漸盡何用石
人張墓道

竹窓雜錄

賞花賦詩

陳述古與蘇子瞻交莫逾詩篇倡和極多子瞻在杭
州吉祥花開招述古不至花將落矣子瞻詩云今歲

東風巧剪裁含情只待使君來對花無信花應恨直
恐明年便不開述古聞之明日卽來子瞻復用前韻
云仙衣不用剪刀裁國色初酣卯酒來太守問花花
有語爲君零落爲君開

竹窓雜錄

述古小妓

陳述古有小妓恒誇詡之子瞻贈之詩云漫說東山
第二州棗林桑泊負春遊城西亦有紅千葉人老簪
花却自羞後述古沒復詩云小桃破萼未勝春羅綺
叢中第一人聞道使君歸去後舞衫歌扇總生塵

竹

百歲詩贊

林旗峯公春澤登正德甲戌進士官太守李萬曆癸未年一百四歲公善詩少與鄭繼之相倡和雖至期願不廢當百歲時撫按兩臺爲建坊公謝詩云翠旗穀口萬松風喘息猶存一老翁詎意夔龍黃閣上猶憐園綺白雲中擎天華表三山壯醉日桑榆百歲紅願借末光垂晚照康衢早晚頌堯封公自贊云武宗皇帝曰爾器資端慎世宗皇帝曰爾大雅不群愧一官之蹇滯負二聖之乾文幸殘喘之苟延龐眉皓髮每曠懷而獨適青山白雲心乎道矣玩詩書而

不厭爲斯世也笑功業以何聞忘此生之碌碌味太
平而欣欣是爲我之云云公子應亮戶部侍郎孫如
楚廣東按察使有人瑞翁集十二卷行世

竹窓雜錄

嶽墓題詩

元林清源題嶽王墓云誰收將骨莖西湖必卜他年
必沼吳孤塚有人來下馬六陵無樹可栖烏廟堂短
計慚婺婦宇宙惟公是丈夫往事重觀如敗局一龕
燈火屬浮屠讀此詩而不墮淚者幾希

南村輟耕錄

虎溪題句

林仲嘉福清人題長溪之虎谿曰山闊青連海溪長

綠遶城規模唐故郡絃誦魯諸生又曰白日經簷短
風霜吹客衣梅稍驚歲晚河際有春歸其所作多類
此輟樓述

題福州詩

呂東萊題福州詩云路逢十客九青衿半是同窓舊
弟兄最憶市橋燈火靜巷南巷北讀書聲舊志

文定遺詩

宋狀元許將登碧巖亭詩云舊室曾留古岼邊新亭
同賞碧巖前日生獅子峰頭木烟伴榴花洞口泉黃
葉入秋山出地白雲臨曉海垂天飄然踪跡今何定

別去江湖又一年又聞清述懷云爲愛山居樂居山
又憶家菊黃來日蒞梅白去時花水闊離情遠霜晴
別路賒前程回首望空指暮天霞許公在宋亦有文
名其集不傳偶見二詩附載于此

竹窓雜錄

松雪畫馬

永樂中黃方伯公澤題松雪畫胡人牧馬圖云黑髮
王孫舊宋人汴京回首已成塵傷心忍見胡兒馬何
事臨池又寫真沈石田亦有詩云兩目晶熒耳竹披
江南流落乘黃姿千金千里真龍種可惜胡兒買去

騎

竹窓雜錄

僞克垂髻

嘉靖間吳小江督學楚中所拔入膠庠者多垂髻士
士之已冠者計去其巾僞克垂髻應試吳公見額有
網痕遂口占嘲之曰昔日裁冠已偉然今朝牛角且
從權時人不識予心苦將謂偷閒學少年一時傳誦
無不絕倒

江盈科諧史

春閨罷綉

萬曆中候官王氏有女名虞鳳字儀卿幼聰慧能詩
年十七卒有罷繡吟一卷春閨詩云濃陰柳色罩窓
紗風送爐烟一縷斜庭草黃昏隨意綠子規啼上木

蘭花

送僧遊閩

宋澶淵趙冲之送惠純上人遊閩詩曰早聽閩人說
土風此身常欲到閩中春溝水動茶花白夏穀雲生
荔子紅襟帶九江山不斷梯航百粵海相通北窓夜
展圖經看索筆題詩送遠公清逸有致

竹窓雜錄

綠野堂詩

水暖鳧鷖行哺子溪深桃李臥開花此鄭文寶題綠
野堂詩也歐陽脩謂不減王摩詰杜少陵惜無全集

耳輟援述

玉蟾文士

白玉蟾七歲能詩賦背誦九經年三十六解化文集
甚富詩有絕似中唐者如鳥聲人靜處山色雨來時
蛇岡嵐霧濕魚市水風腥清風千里夢明月一聲砧
虎嘯月生海猿啼風撼山夕照雌黃筆秋烟水墨屏
雨壁琴絃潤風窓硯水枯又如山後山前鳩喚婦舍
南舍北竹生孫博山香篆浮青蚓古壁燈光吐玉蟲
雲粘暮色月華濕樹顛秋聲天籟寒許瓢却大堯天
小巖瀨應高漢座卑天際寒雲糊遠岫松梢歸鶴客
枯枝有客放船青草渡何人吹笛夕陽樓皆精工有

致今坊肆所梓白集盡芟他作惟存丹訣數首不知
玉蟾初年之著作亦宋季一文士也臞仙老人所編
次者爲全

弓寮詩畫

林泳號弓寮林希逸之子也獄王墓詩云天意只如
此將軍足可傷忠無身報主寃有骨封王苔雨樓墻
暗花風廟路香沈思百年事揮淚對斜陽弓寮善畫
不以詩名此首見西湖志

竹窓雜錄

臥芝山人

臥芝山人傅汝楫丁戊山人汝舟之弟也貧而博學

州縣辟爲黌宮弟子不就一意詩歌時稱二傅汝楫
早李詩類晚唐如野人臥酒翻荷爵山鬼縫衣傍荔
墻又如沙際學書尋鳥跡林間會意解禽言又如幾
處姓名留洞府十年瓢笠任風煙皆佳句也

竹窓雜

雲崩塔勢

吳興道場山有海天閣謝在杭爲司理時題詩云飛
閣接天都珠宮控太湖山光圍百雉野色入三吳木
落禽聲盡雲崩塔勢孤東南多王氣回首起栖鳥而
雲崩塔勢孤之句爲時人所傳誦友人鄭翰卿寄之

詩云翠荇青蒲碧浪湖裁詩對酒憶人無謝郎近日
縱橫甚尚有雲崩塔勢孤

述淨名意

隋王胄臥疾閩越述淨名意序云余臥疾閩海彌留
旬朔善友顓法師勸余以淨名妙典調伏身心力疾
粗陳其意敬簡法師云爾詩云客行萬餘里眇然滄
海上五嶺常炎鬱百越多山瘴無以勞形神遂此嬰
波恙桐雷邈已遠砥石良難訪抱影私自憐霑禁獨
惆悵毗城有長者生平夙所尚復籍大因緣勉以深
回向心路資調伏於焉念實相水沫本難摩乾城空

有狀是生非至理是我皆虛妄求之不可得誰其受業障信矣大醫王茲力誠無量

邊塞風景

唐詩述邊塞風景佳者都在五言及七言絕句耳至于七言近體佳句不數數見也余友鄭翰卿工七言且少遊邊疆檢其集中多悲壯語如馬邑吹笳烽子急鴈門獵火健兒歸霜色欲將關樹拆河聲如帶戍樓奔馬行空磧聞嘶斷人度殘冰過語喧沙磧到天歸馬小朔雲連海遠鴻佢劍戟已消兵後火髑髏猶泣戰時瘡回中曉竈炊霜飯磧裏宵衣踏月行磧上

陰雲連塞黑關前落日帶沙黃亂山獨馬嘶殘月遠
磧離鴻叫曙霜胡騎分營來漢塚蕃河流水到秦川
等句令人讀之有封狼居胥之志若陳幼孺之鵬飛
塞日翻胡影馬飲流泉咽漢聲馬季聲之馬勒桃花
啣苜蓿笳吹蘆葉度榆林謝在杭之風吹紫塞草欲
盡馬蹴黃河水未殘亦不減鄭生高韻

竹窓雜錄

紫陽書院

長樂陳少司馬致政還山結廬于武夷五曲雲窩隱
焉雲窩占九曲之勝曲榭危闌高軒踈牖莫不精麗
雲窩之左爲朱文公書院頗頽塌荒廢有友人經遊

題一詩于壁云紫陽書院對清波破壁殘碑半女蘿
頗愛隔隣亭榭勝畫闌朱拱是雲窩是時司馬久未
入山後至見壁間詩笑曰題詩者其吾盡臣乎卽日
捐橐中裝爲之脩復今書院弘厥尤勝云

竹窓雜錄

詩詞

葛僊像贊

宋白玉蟾姓葛名長庚號瓊瑄閩清人嘗贊朱文公
塑遺像云天地棺日月墓夫子何之梁木壞泰山頽
哲人萎矣兩楹之夢旣往一唯之妙不傳竹簡生塵
杏壇已草嗟文公七十一年玉潔冰清空武夷三十

六峰猿啼鶴唳絃管之聲猶在耳藻木之像賴何人
仰之彌高鑽之彌堅聽之不聞視之不見恍兮有像
未喪斯文唯正心誠意者知之欲存神索至者說爾
玉蟾自贊云千古蓬頭跣足一生服氣飡霞笑指武
夷山下白雲深處吾家嘉定間徵赴闕對御稱旨館
太乙宮一日不知所往詔封紫清明道真人

仙史類

編

麗賦警句

黃滔律賦如明皇回駕經馬嵬隔句云日慘風悲到
玉顏之死處花愁露泣認朱臉之啼痕褒雲萬疊斷

腸新出於啼猿秦樹千層比翼不如於飛鳥景陽井
云理昧納隍處窮泉而詎得誠乖馭朽攀素纆以胡
顏又孟嘗君夜度函谷賦嘆秦關之百二難騁狼心
笑齊客之三千不如鷄口亦可喜也

丹鉛總錄

晚唐士人作律賦多以古事爲題寓悲傷之旨如吳
融徐寅諸人是也黃滔字文江亦以此擅名如馬嵬
坡景陽井館娃宮陳皇后凡數十聯皆研確精致若
夫格律之卑則自當時體如此耳

容齋四筆

陶使再來

洪武中福建按察使陶屋仲寧波人性清介在任治

賦更革宿弊時布政薛大方貪暴屋仲奏之大方亦
奏俱至京問理事既白大方得罪屋仲還職時人爲
之語曰陶使再來天有眼薛公不去地無皮

餘冬序

禹碑譯文

楊用修丹鉛總錄云禹碑在岫巖峰昔樵人曾見之
宋嘉定中蜀士因樵夫引至其所以紙打其碑七十
二字刻于夔門觀之近張季文僉憲自長沙得之云
是嘉定中何政子一摸刻于嶽麓書院者用修譯其
文七十七字又自作歌以紀之古文以意猜度似涉

支離董廷欽讀禹碑詩云晨望嶽麓山悠悠恣登陟
霞彩散崇岡叅蘿掛蒼壁路逢樵者言峒嶠有竒蹟
飛翥若鸞龍云是禹碑石累累七十字字字不可識
古異駢斗文恠匪斯縮筆用修好竒士今文手親譯
緬想治水功天授非人力得非宛委藏神符今散逸
我觀五嶽圖真形甚竒僻恐是山川形亦與五嶽匹
關文安可尋郢調詎堪釋爲語夜郎翁支離太無益

榕陰新檢卷十五終